

## Ер юзидагиларга раҳм қил



18:59 / 01.03.2018 4146

372. Қубайса ибн Жобирдан ривоят қилинади:

**«Умар шундай деди:**

**«Ким раҳм қилмаса, унга ҳам раҳм қилинмайди.**

**Ким бирорни кечирмаса, у ҳам кечирилмайди.**

**Ким бирорни афв қилмаса, у ҳам афв қилинмайди.**

**Ким бирорни бирор нарсадан сақламаса, уни ҳам бирор нарсадан сақламайди».**

**Шарҳ:** Қубайса ибн Жобир розияллоху анхудан ривоят қилинган бу ҳадис аввалги ҳадиснинг айнан ўзи. Бироқ раҳмга даъват қилингани учун такрор келтирилибди.

373. Муовия ибн Қурра отасидан ривоят қилади:

**«Бир киши:**

**«Эй Аллоҳнинг Расули! Мен қўй сўйсам, унга раҳм қиласман ёки қўйга раҳмим келганидан сўя олмайман», деди.**

**«Сен қўйга раҳм қилган бўлсанг, Аллоҳ сенга раҳм қиласди», деб икки марта айтдилар».**

**Шарҳ:** Демак, нафақат инсонга, балки ҳайвонга кўрсатилган раҳм-шафқат ҳам вақти келгандан Аллоҳ таолонинг раҳм-шафқатига сабаб бўлар экан.

Шунинг учун нафақат инсон зотига, балки ҳайвонот оламига, наботот оламига ҳам раҳм-шафқатли бўлиш, уларни қийнамаслик, қийналган бўлса, қийноқдан озод этиш, уларга озор бермаслик мўмин-мусулмонларнинг одобларидан ҳисобланади.

Бундай амални қилган одамга Аллоҳ таолонинг Ўзи раҳм қиласди, унга Аллоҳ таолонинг раҳм-шафқати, меҳрини қозониш насиб бўлади. Бу жуда улуғ нарса.

374. Абу Ҳурайрадан ривоят қилинади:

**«Мен содиқул масдуқ Абулқосим Набий соллаллоҳу алайҳи вассалламнинг «Раҳмат фақат бадбаҳтдангина суғуриб олинади», деганларини эшийтдим».**

**Шарҳ:** Фақат ҳақиқий баҳтсиз, бадбаҳт инсондагина раҳм-шафқат бўлмайди. Раҳм-шафқат бошқа барча инсонларда бўлади.

Кимда раҳм-шафқат бўлмаса, бу унинг баҳтсизлиги, бадбаҳтлиги аломати бўлади.

Кимнинг мўмин-мусулмонлиги ҳақиқий бўлса, унда албатта раҳм-шафқат бўлади.

Бундай шафқат умумий бўлиб, инсон зотига, ҳайвонотга, набототга, раҳм-шафқатга муҳтож бўлган ҳар қандай нарсага тааллуклидир.

Аллоҳ таоло ана шу раҳм-шафқатни мўмин-мусулмонларга раво кўрган экан. Уни фақат бадбаҳт инсондангина суғуриб олиб, уни бераҳм, бешафқат бир жонзотга айлантириб қўяр экан. Бундан Аллоҳ таолонинг Ўзи сақласин.

375. Жарийрдан ривоят қилинади:

**«Набий соллаллоҳу алайҳи васаллам: «Ким одамларга раҳм қилмаса, Аллоҳ унга ҳам раҳм қилмайди», дедилар».**

**Шарҳ:** Демак, одамларга раҳм қилмаган одам Аллоҳ таолонинг раҳматидан умидвор бўлиши мумкин экан.

Аксинча, «мафхумул мухолафа» қоидасига биноан, одамларга раҳм қилган одам Аллоҳ таолонинг раҳматидан умидвор бўлиши мумкин.

Иншааллоҳ, одамларга кўрсатилган раҳм туфайли Аллоҳ таолонинг раҳматига, шафқатига сазовор бўлиш мумкин.

***Шайх Муҳаммад Содик Муҳаммад Юсуф***

*(Одоблар ҳазинаси китобидан)*